

Preschantaziuns chi han persvas

Ma l'ora ha fat ün strich tras il quint da la Festa da musica districtuala

DA MARTINA FONTANA / ANR

■ **La Festa da musica districtuala chi ha gnü lö la fin d'eivna passada a Silvaplauna ha persvas. Quai cumbain cha Petrus ha pisserà per temperaturas d'inviern. Las preschantaziuns dals musicants han però s-chodà ils cours dals audituors.** «Las preschantaziuns dals tocs da tscherna cha nus vain pudü dudir in sonda e dumengia sun stattas d'ota qualità ed han fat grond plaschair», disch *Curdin S. Brunold*, president da la cumischiun da musica dal district da musica chi cumpiglia l'Engiadina, la Val Müstair, la Val Bregaglia e la Val Poschiavo. Ch'eir las preschantaziuns in tenda da festa sajan stattas bellas e cha tuot la festa haja insomma derasà «l'orma da la musica». «Id es simplamaing puchà cha l'ora d'eira uschè trida cha nus vain stuvü sdir giò il cortegi tras cumün e las concorrenzas da marchar», intuna Brunold chi'd es eir commember da la cumischiun da musica chantunala.

Musicants cuntaints

La sfida da trenar ün toc da tscherna dürant lönch temp e da til pudair preschantar in seguit ad experts in occasiun da la Festa da musica districtuala es per bleras musicantas e musicants ün dovair chi fa plaschair. «I s'es nervus ed i's spera da far tuot güst», ha dit üna musicanta da Brail chi ha in seguit a la preschantaziun da sia società gnü grond plaschair dal güdicat dals experts rajiunt. «Puchà cha nus nun's avain pudü preschantar eir in occasiun da la concorrenza da marchar e cul cortegi da tuot las musicas tras cumün», ha dit ün musicant da Ramosch. Ch'in general as possa però esser cuntaint: «L'organisaziun da la festa d'eira fich buna ed il trategnimaint da la saira da festa cun las musicas da giast e cun la musica da bal d'eira genial», ha'na dit.

Rajiunt il böt – eir scha quel vess pudü esser meglider

«Fin sün l'ora es il bilantsch ch'eu poss trar ün bun», ha resümà *Not Janett* da

Silvaplauna, vicepresidente da l'Uniun da musica chantunala, l'andit da la festa in cuorts peds. Cha l'organisaziun da la festa haja funcziunà bain e cha las societats partecipadas a la festa sajan stattas cuntaintas. «Mi'impreschiun da quista festa es positiva», ha dit il president da l'organisaziun da la Festa da musica districtuala a Silvaplauna, *Heinz Ming*. Cha tant pro las preschantaziuns da concorrenza dals tocs da tscherna sco eir dürant las preschantaziuns da la saira da festa s'haja plü o main rajiunt il nomer dals visitaduors da la festa previss. «Causa l'ora pac allegraivla e la desditta dal cortegi e da la concorrenza da marchar stuvaina però acceptar cha vain listess damain giasts co cha'ns vaina giävüschats», ha'l intunà. Ch'in general as possa però esser cuntaint cul resultat rajiunt ed ingrazchar a tuot quellas persunas chi s'han in l'üna o l'otra maniera ingaschadas pel success rajiunt dürant la fin d'eivna da musica a Silvaplauna.



Not Janett, vicepresidente da l'Uniun da musica chantunala, Curdin S. Brunold, president da la cumischiun da musica dal district e da la cumischiun da musica chantunala e Heinz Ming, president dal comité d'organisaziun da la Festa da musica districtuala a Silvaplana, sun cuntaints cun l'andamaint da la festa da la fin d'eivna passada.

FOTOS M. FONTANA



La Società da musica da Poschiavo ha persvas: Saja quai cun sia musica, cun seis musicants giuvens sco eir cun seis temperamaint.



La sala da l'auditori da la chasa da scoula da Silvaplauna d'eira bod massa pitschen per tuot il public chi ha vuglù dudir las preschantaziuns dals tocs da tscherna.



Ils «Habsburg Musikanten» han dat ün concert da gala chi ha persvas a blers.



Decoraziuns da bellezza han pisserà per la tipica atmosfera da «festa da musica».